

ZOMI FESTIVAL OF PRAISE 2005
TEDIM, ZOGAM



REV GK NANG

ZOMI LASIAMTE' TANGTHU



Distributed by | Vaphual.net

Zomi Lasiamte' Tangthu

Rev. G.K.Nang

Important Notice: Hih laibu a gelhpa Rev GK Nang' phalna leh deihsakna tawh Vaphual.net pan a mawkna in hong kihawm khia ahihi. Lungdam thu puak nuamte'n Zomi Yahoo! Groups ah suah un!

First Publication, 2009 Copyright: Zo Aw Publications, Guwahati.

Designed & Edited by Carey Suante, Editor www.Vaphual.net

La lam hong pattah masa
Sia Lianbawi,
Sia Lam Cin, leh
Sia Thawngkimte
Phawk Tawntungna Ding

Contents- Zon Olna

PS: Press Ctrl + Shift + N and input the page number where you want to go directly!

THUMASA	6
LA LAM KHANTOHNNA - REV. JOB THAWNGNO	8
THANG SIAN KHAI (T.S.KHAI)	10
PIANNA	10
SUMBAWL LAWHSAM.....	10
PASIAN NASEPNA	10
LA TAWH KISAI NASEPNA.....	10
PAHTAWINA	12
MINAM ADING A SEPNA.....	12
CIN ZA HAU PAU (LENGTONG PAUNO)	14
PIANNA	14
LENGTONG PAUNO CIH HONG PIANNA.....	14
LA TAWH KISAI NASEPNA.....	14
LIA MAN SUAN CING (LIA CINGSAN).....	16
DORCAS TEAM PIANG	16
LAI SIANGTHO SANGKAH.....	16
EBC-AH NASEPNA.....	16
PAHTAWINA.....	17
LANGH DO KHUP (DO KHUP)	18
PIANNA	18
PILNA LAM	18
LA LAM NASEPNA	18
NANG SUAN KHAM (DAVID KHAM).....	20
PIANNA	20
PILNA LAM	20
ZI NEIHNA	20
LA TAWH KISAI NASEPNA.....	20
GO LIAN SUUM (DAVID SUUM)	22
PIANNA	22
PILNA LAM	22
LA LAM TAWH KISAI	22
FESTIVAL OF PRAISE (LA PAWIPI).....	23
GRACE MUSIC INSTITUTE	23
FAMILY GOSPEL TEAM	24
ZOMI MUSIC UPLIFT SOCIETY	26
TUPNA LEH NGIMNA.....	26
SEPDATE.....	26
MAI LAM KALSUANNA DING GEELNA	27
TU LAITAK A MAKATE:.....	27
ADVISORS:	28
ZOMI FESTIVAL OF PRAISE (ZOFOP).....	29
ZOFOP KICI HONG PIAN KHATNA.....	29
ZOFOP BANG CIHNA HIAM?	30

TUPNA LEH NGIMNA.....	30
HUN ZATZIA	30
LUNG DAMNA KHITUI LUANG	31
PHATTUAMNATE	31
LAPAWL (CHOIR) KIHTEL TENG.....	32
THUKHUPNA	33
ZOMI CONCERT	34
MAI LAM KALSUAN ZIA DING	35
LAIGELHPA' TANGTHU	36
TOMLAKNA (ABBREVIATIONS)	37

Thumasa

Khanlawhna hanga La lam khantoh zia tangthu ka kanna panin theih huai leh ciamteh huai tampi ka mu hi. A diakin Zomite sungah la phuak siam tampi tak ki-om a, eima lungsim ngiat pana la kiphuakte in lungsim hong zo-in kikheelna piangsak hi cih kimu thei hi.

Sia Job Thawngno in “Khanlawhna in La piangsak a, La in khanlawhna piangsak hi” a cih pen thuman ahi hi. Khanlawhna hangin la lamah kikhangto a, la hangin khanlawhna in gam keek hi. La in gamgi nei loin, Pawlpi deidan nei lo hi. Khanlawhna ii mainawtna thu ka ngaihsut ciangin la hang hi ci-in ka ngaihsun hi. Zomite omna peuhpeuhah tuhun la thakte kisa-in naupangte in kimawlana la bangin zang liang uh hi.

Mizogam ka om lai-in ka zin kawikawina-ah “Topa tungah lungdam ka ko ding” cih ahi zongin “Topa hoih hi, Topa lian hi” cih ahi zongin eimi omna khua khempeuhah Lusei hi leh Zomi hi leh naupangte in sa thei tek uh hi cih ka mu hi. Tua ahiah manin hih tualsuak late in koici bangin nasem hiam cih pen a phuakte in zong phawk khin lo kha ding uh hi. Mipite in zong koici bangin lasiamte in la hong siam a, koici bangin Pasion mu uh a, koici bangin Pasion adingin kizang uh hiam cih pen thei nuam tek dingin ka lamen hi.

Tua ahiah manin Pasion leh minam adingin hong kipat khiat dan uh i theih tek theihna dingin a tangthu uh a kithei bangbang hong kigelh ahi hi. A tamzaw pen amau hong puakna pana kila sawn hi a, theih khialh leh gelh khialh zong om kha ding hi. Hih khialhnate-ah nong maisak ding uh kong thum hi.

Lasiam mimal banah Zomi Music Uplift Society (ZOMUS) tangthu, Zomi Lasak Pawi (Festival of Praise) leh Zomi Concert tangthute zong hong kihel hi. Tua banah lasiamte a vekun kihel nuam napi-in amau tawh thu kizakna haksa ahiah manin deih khempeuh hong kihel zo lo hi.

Kua teng hel dinga, kua teng hel lo ding cih zong khensatna om hi loin, tangthu akingah thei teng hong kigelh ahi hi. Hih sunga teng bek lasiam hi zenzen lo hi cih i theih ding leh mai lamah zong lasiam tampi hong khang lai ding hi cih zong i phawk ding deih huai hi.

Hih laibu panin lasiamte manphatna leh lasiamte pahtawi huai ahiahna phawkin, Pasion in Zomi khangno a tam sem la siam hong piak laina ding zong thu ngetna-ah phawk leeng ci-in kong pulak nuam hi. Hih laibu a pianna ding tawh kisai a tangthu hong puakte leh a hong huh mimal khempeuh tungah lungdam thu kong puak hi.

A khetna lamah Dr. S. Neng Ngaih Lian in hong sepsak ciangin a piang thei pan ahi hi. A diakin Rev. Job Thawngno tungah zong lungdamna lian hi. Tua ahih manin ama gelhte thu kong honna (Preface) danin kong hel hi. A simte khempeuh Topa in thupha hong pia ciat ta hen.

Rev. G.K.Nang

Fuller Theological Seminary
135 North Oakland Avenue,
Pasadena, CA 91182, USA.

Jan.4, 2009

La Lam Khantohna - Rev. Job Thawngno

A beisa hunah Pasion phatna dingin Tedim labu bek mah kizang hi. Hih Tedim Labu i cih pen Mikangte khanlawhna sunga kiphuak a kitei sawn ahi hi. Sia Vial Nang hun lai-a kipan, Sia Hau Go, Sia Kam Khaw Thang leh makai masate in tei-in a bu-in hong bawl uh hi. A tungin La dawng 15, 25 cih bang bek hi a, kibehlap toto-in tu-in dawng 400 val bang i nei hi. Biak piakna khempeuhah kizangin la dang kinei mel lo hi. Tu ni dongin hih late mah Pasion phatna leh biak piakna-ah kizang hi.



Ahi zongin kum 1970 Zogam khanlawhna hangin La lamah nakpi khantohna hong piang hi. Khanlawhna hangin la tampi kibehlapin, La tung tawnin khanlawhna zong piang hi. Bang hang hiam cih leh La in mite lungsim lawngin, bunin, khitui luangsakin, kikhelna piangsak thei hi. La in gangi nei loin, Pawlpi deidan nei tuan loin nasem ahih manin La manphatna thupi mahmah hi. Zomite sungah Pasion mi zat La phuak siam leh La tawh Pasion nasem tampi hong piang khia ta hi. Khanlawhna hong tuncil lai-in Rev. Gin Za Lian (Lianbawi) in Mikangte Latom (Chorus) te hong tei-in Latomno ci-in biakna-ah kizang hi. 1980 kum pawla kipanin la phuak siam hong om ta-in Sia Lianbawi, Sia Thawng Kim, Sia En Lam Cinte makaihna tawh la lamah nakpi khantohna piang hi. 1980 kumin Sia Lianbawi makaihna tawh Cassette-ah khumin la hong kihawm ciangin mite lungsim lawng mahmah hi. Tua zomah Sia T.S. Khai, Sia Lengtong Pauno, Sia Lang Do Khup, Sia Thawn Kham, Sia David Kham, Sia David Suum, Sia T.L. Mungbawi cihte hong piang khia hi. Sia Thawng Kim in La dawng 100 val phuakin, Sia T.S. Khai in dawng 1200 val phuak a, dawng 200-300 phuak cih pen kitam mahmah ta hi.

Hih late pen tuhun ciangin “Latomno” kici nawn loin “Tualsuak La” kici a, a bu-in kibawlin min tuamtuam kineisak a, Zolimtui, Galhiam Labu, Khanlawhna Labu, Siansan Labu, Phatna Labu cih bangin min tuamtuam kineisak hi. Tualsuak late pen Gup khatna lam, Lungdamna lam, Thupha ngahna lam, Leivui pana laptohna lam, Piakkhatna lam, Lungdam Bawl la cih bangin kikhen thei hi. Hihte banah gamngaih la leh minam itna la zong tampi mah kinei ta hi. Biakinn sung nangawnah gamngaih la leh minam la kisa ta hi. Nidangin Kawl la leh Mikang la panin Zo kam tawh kitei a, tuhun ciangin Zokam panin Kawl kam leh pau dang tawh kitei zaw ta hi. Sia David Kham La pawl khatte bang pau dang nam 8 tawh kitei-in kideih mahmah hi.

Tualsuak late a kisa ciangin vial nih vial thum kisa a, kilotngah pahpah hi. Tedim Labu sunga late lotngah haksa kisa mahmah napi-in tualsuak late pen lotngah vive tawh kisa zaw hi. Late a manthat lohna dingin Cassette tawh bawlin khui 2000-6000 kikal bang a hawm khia zo om hi. Cassette khui panin CD, DVD, VCD tawh kibawlin gam tuamtuamah kihawmkhia a, kikem cing thei ta hi.

A beisa hunah music van lam biakinnah kizang loin Dawi biakna bangin kingaihsun a, Guitar (Githa) bang diak pen “Dahpa Khuang” kici-in tangval ginalote van zat dingin kikoih hi. Khuang leh tunging dangte zong kizang loin daai takin biakna kipia hi. Tuhun ciangin a gamlum theithei dingin biakna kipia a, music lo tawh biakna kipia thei nawn lo cih ding hi ta hi. A nei lo pente in zong Guitar ahih kei leh khuang zang ta uh a, Piano, Organ, Keyboard leh Drum a zang tampi tak om ta hi. Music tum siam “Music Band” zong a hun khop kinei hi. Lengtong Band kici Hau Za Cin Pau, Kam Khen Thang, Go Hau, Sua Mang leh Pau Thawnte makaihna hi. Hornbill Band, Grace Music Band, Gatam Band cih bang omin, tu laitakin Tahan Sia Deihpi makaihna “Falcon Band” kizang mahmah hi. Tua mah bangin Music lam sin degree la zong i nei ta hi. Sia Tuan Khan Mung in Singapore pan, Sia David Suum in Philippine pan, Sia Nang Mun Lian in UK pen, Sia Nungbawi in USA pan music lam pilna hong ngah uh hi. Sia David Suum in music sinna Sang “Grace Music Institute” kici 2005 kum panin Yangonah phuanin kum 1-2 dong sin theihna om hi.

Tuhun ciangin khangnote sungah zawlla sa om nawn loin biakna la vive kisa ta ahih manin nakpi takin minam sungah kikhelna om hi ci-in kimu thei hi. Zola mal tawh biakna la phuakin Zola kaih tawh Pasion biakna a bawl zong om ta hi. Tonic Solfa bek hi nawn loin, Lungtui (Staff Notation) tawh Labu kibawl zong om hi. Hihte khempeuh pen La lam khantohna hi ci-in kimu thei hi. Topa pen phat ding a ut hi a, Zomite phat ding zong ut hi. “**Aw**” tawh a phat thei lote in zong i nuntakna mahmah tawh Topa phat thei a, a lungdamsak thei i suah tek theihna dingin Zomite khempeuh Topa’n thupha hong pia ta hen.

(Hib thu pen Sia Job Thawngno in Nov.13, 2007 ni-a a gelb “Khanlawbna hanga La lam Khantohna” cih sung bulphuhin hong gelb khia abi hi)

Thang Sian Khai (T.S.Khai)

Pianna

“Zogam Lapu” ci-a min nei Sia Thang Sian Khai pen Pimpih khua-ah 23.2.1957 ni-in piang hi. Pimpih khua-ah Tan 4 a zawh ciangin 1968-1975 sung State High School Tedimah kahin tua panin Thuklai-ah kisanin 1978 kumin Tan 10 Thuklai State High School panin a zo hi. 1978-1984 sung Rangoon University-ah kahin 1984 kumin B.A. (Philosophy) a zo hi.



Sumbawl lawhsam

Laisim a zawh ciangin sum bawl ding ngaihsunin Lamka lamah khualzin zel hi. Ahi zongin tuahsiatna tuak den ahih manin a lungkia hi. 1984-1985 sung Imphal-ah kha 3 sung thong kia hi. Kum 1987 Sept. 9 ni-in Cikha leh Tonzang kikalaw sum bawlin a khualzinna-ah ni khatin nihvei motor accident tuak hi. Ahi zongin Pasion in keemin liamna baina nei het loin suakta hi. Tua bangin tuahsiatna pan a suahtakna pen Pasion deihna om ding hi ci-in tua panin Pasion nasem dingin kipia khia hi.

Pasion nasepna

1987 kum tawp lam ciangin Tahan a om Evangelical Free Church of Burma (Myanmar) Pawlpi-ah Youth Worker hunbitin sem hi. 1990 kum ciangin Rakhai gam Kyawkdaw ah missionary na sem dingin pai a, 1990 tawp lam pan 1992 dong Pegu Division Penwegone khua-ah kisan leuleu hi. 1992-1994 sung a pianna Pimpih khua-ah Local Pastor sem hi. 1995-1997 sung Tedim khuapi sungah Anti-drug Christian Youth Fellowship phuanin guih theih kham theih veina late a sa kawikawi hi. Khangno a sia tampi takin kikhelna-in nei uh hi. Evangelical Baptist Conference Pawlpi-ah kum 1994- 2007 sung gambupah La makaipi (Music Director) sem hi. 2007 kum a kipanin Tahanah a zi Zam Ngaih Lun leh a tate pasal 4 leh numei 3 tawh Pasion na semin om uh hi.

La tawh kisai nasepna

Aneu tung Tan 3 a sim lai-in Tahan panin Independent Church of Burma (ICB) kici tu-in EFCB panin Lusei lapawlte a khua uhah pai-in lasa uh a, siam sa mahmah hi. Lapawlte tawh kikhawlin a *tenor* bang a zui thei pah hi. A tangval ciangin a pu Dai Khan Gin (tu'n USA) in Solfa

hilih zelin 1974 pawl ciangin Lapawlah kihelin la phuak kipan ta hi. La uuk kisa-in Tedim State High Schoolah a kah lai-in zunthak khuan sung nangawnin lapawl sa zo zen uh hi. Tua hun lai-a Zangkung Radio Zo hunah lasa zel Sia Gin Hang, Sia Mang Za Suan, Sia Kham Go Mang cihte eng lua-in, “Kei zong Tan 10 ka zawh ciang Zangkung Radio pan la sa nuam tei ing ei maw” ci den hi. 1978 kumin Tan 10 a on’ ciangin nuam lua-in Zangkung Radio-ah lasa thei ta ding ci-in Zangkungah College kah zawhna ding lampi a zong hi. A pu Huat Cin in Ks.100 dal khat pia-in tua tawh Yangon tung hi. Yangon a tun’ ciangin Radio panin lasa thei takpi hi. “Ut mahmahin tum tentan peuh lehang Topa in hong gual zawhpih hi” cih pen a teci pan’na ahi hi. 1980 kumin Sia En Lam Cinte pawlin “Blue Hill” kici lakhui a khum lai-un amah zong la dawng khat beek khum nuam, sa nuam mahmahin a kineelneel hangin sak khuan a ngah zo kei hi. Sia Gin Za Lian (Lianbawi) makaihna tawh Agape No.1 a khum leuleu uh ciangin ut lua kisa-in kineelneel taleh a lut zo peuhmah kei hi. “La dawng khat sa thei-in si pah mai leng zong phamawh ka sa kei hi” cih zah dongin la khumna-ah kihel nuam hi. A sawt loin Zangkung Zomi Tuiphum Pawlpi huhna Ks.1000 tawh 1980 kum tawp lam ciangin “Sihna Kigo Zo” No.1 khum thei a, a lungdam zia kigen thei lo hi. A la khui pen zom toto-in tu-in Series No. 11 dong khum zo a, a la phuak khempeuh 1200 val khin zo hi. A la phuakte lakah gamngaih la “Tuun sung khat pan piang hi ngeingei hang e” cih pen a minthang mahmah khat hi a, biakna la lamah “La kik thei leng maw” cih pen a deih mahmah khat ahi hi. Sihna kigo zo series a kum leh a sponsorte hih bang hi.

<u>Series</u>	<u>Kum</u>	<u>Sponsor</u>
1) Sihna Kigo zo	No.1 1980	Zangkung Zomi Tuiphum (Gupkhiatna late)
2) „	No.2 1981	Tg. Vunghpi (Thokik ning)
3) „	No.3 1982	Pa Suum (Up lohin Pa’ mai mu lo)
4) „	No.4 1983	TS Mang, VKPau, TS Khai (A lian mah2 gupna)
5) „	No.5 1984	Dampu (Pyidawtha) (Z-0-Z0)
6) „	No.6 1989	Pa Kham Sian Pau (Sezang) (Tuubanga hong cing Topa)
7) „	No.7 1991	Pa On Za Pau (Saizang) (Zeisu in Topa hi)
8) „	No.8 1996	Pa On Za Pau, Pa Suan Pau (Keellu phum)
9) „	No.9 1998	Pa Khan Lian Piang, Cia Pau (Topa Zeisu min thang hi)

- 10) „ No.10 2001 Mrs. Hau Go, Dr. Go Za Kham (A tul thei lo Biakinn late)
- 11) „ No.11 2003 Pu Dai Khan Gin (USA) (Christmas Album)

Hih a la khumte sung panin No.8-na 1996 kuma a khum “Keel lu phum” cih pen mite tha ngahna leh a nungta pen khat ahi hi. A la phuah a tamzaw pen gup khatna, sep khatna leh pai khat a kulna thute tam pen hi.

Pahtawina

Hih a nuai bangin pahtawina tuamtuan ngah ngei hi.

1. 1995 kumin Tedim AG Sectionte in la tawh kisai a phuak leh sa siam ahihna pahtawina-in Sum Ks.400 leh Labu 1 pia hi.
2. 1998 kumin Tedim Christian Fellowship in Beelkang khap 7 khat leh laipi pia hi.
3. 2002 kumin Yangon Momnote’n Laidalpi khat pia hi.
4. 2005 kumin ZOMUS te’n lasa masate pahtawina-in Laidalpi pia hi.
5. 2005 kumin ZOMUS te’n la phuak masa pahtawina Laipi pia hi.
6. 2005 kumin ZCLS te’n Silver Jubilee phawkna-in Laipi pia hi.
7. 2005 March kha-in Thangsan khua kum 100 cin Lapi pahtawina pia hi.
8. 2006 kumin Japan Zolentang te’n La phuak tam pen leh khui tam thoh pen pahtawina Laipi 2 leh sum Ks.2,00,000 pia hi.
9. 2007 kumin Singapore ZOMUS te’n pahtawina-in Singapore-ah tawlngea dingin sam a, khanih (May-June) sung va om hi.

Minam ading a sepna

Kum 1978-1984 sung Yangonah College a kah sungin minam adingin mualsuang hoih mahmah khat a phut ngei hi. 1982 kumin Zomi Nam Ni Feb.20, 1982 pen Rangoon University huang sungah zang uh hi. Tedim mi sung panin lasa dingin U Am Pau tawh kish hi. Lasa dingte min a piakna uhah “Tg. Thang Sian Khai” ci-in lai tawh min pia uh hi. La a sak ding ciangin *Announcer* nu in “Tu-in Salai Thang Sian Khai in la hong sa ding hi” ci-in pulak hi. Amah zong *stage* tungah ding to-in “Ka min hong gen khial uh teh, kei Salai Thang Sian Khai hi lo, Tg. Thang Sian Khai hi’ng” ci-in lasak tawh a thuah hi. La a sak khit phetin *stage* kim tengah “Salai” (Khalkha pau) deih leh deih lo kinalna omin kibuai gawp uh hi. Ahi zongin a tawpna-ah Prof. Phun Kar Thang in “Hih pen a min neipa deih lohpi a Salai kibulhsak pen a kikhial mah hi” ci-in a thum kik uh ciangin kilem kik thei uh hi. Hih ni akipanin Lia leh Taang cih leh Salai leh Mai

deih leh deih loh thu in thakhat thu-in Kawlgam Vaigam zel suak hi. Tua kum Tan 10 laivuanpi a kipan sim leh mal a om Zomi peuhmah in Lia leh Taang ci-in a min mai-ah bulh pah ziahziah uh hi. Tua ahih manin Zomite ading tangthu mualsuang hoih mahmah khat a phut a suak hi. Tu lai khangthakte in Lia leh Taang a zat ciat ding cih zong a deihna bulpi khat ahi hi.

(Hib pen Nov.9, 2007 ni ama tangthu a gelbna sung pan kila hi)

Cin Za Hau Pau (Lengtong Pauno)

Pianna

Lengtong Pauno kici Cin Za Hau Pau pen Pa Zel Khaw Khai leh Nu Ciang Khaw Niangte ta 11 sung panin a nau tum pen, nau kongkhakpa ahi hi. Kum 1962 August 23 ni-in Sakollam ah suak hi. Kum 1990 June 25 ni-in Vangteh nungak (Kawlpi a om) Lia Goih Khan Dim tawh Tonzang khua-ah pum khat suahna nei-in Rev. Thawng Khaw Nang in lethat hi. Tu lai takin a pu a pate khua ahi Tuithang khua-ah a zi leh tapa 3 tawh a teng uh hi.



Lengtong Pauno cih hong pianna

Bang hanga “Lengtong Pauno” kici hiam cih leh a nu leh pate in “Pauno” ci-in sam uh hi. Lengtong lakhui a bawl uh ciangin Tg. Pauno min tawh la sa uh hi. Pauno kici lasiam dang ong tam ciangin ama min a gen nuamte in Lengtong a lasa Pauno cihna-in “Lengtong Pauno” cih min khat hong piang khia hi. Ama deihna-ah bel a nu leh pa phuah “Pauno” cih mah deih pen a, vantung dongah a min ding ahih manin thupi a sa hi.

La tawh kisai nasepna

Kum 8 a phak a kipanin Pasion phatna la tomnote phuakin Sunday School khawngah a sa thei zel hi. Kum 11 a phak laitakin nungak talpi khat ngai a, ama theih loh kalin la khat phuakin “Na min thei bang lolo nuam ing” ci deep sam hi. Tua bangin la phuah leh lasak kipanin 1981 kumin a masa pen la khum hi. A la phuak khempueh akigawmin 200 bang val ta ding a, tua lakah dawng 60 bang Studio-ah kisa khin zo hi. Lakhui pen amah guak bekin a khum khui 3 bang pha-in lawmte tawh a khum Lengtong No.1, 2, 3 pha zo hi. La phuahte sung pan hoih sak diak cih bang nei loin, hoih sa khin lel a, nupite in a tate min pen mi’n hoih sa kei taleh hoih a sak veve danin gen hi. A khui hawm khiat sung panin Lengtong No.5 “Zogam hong paal ding” cih mah tha ngah pen hi. “Tun sung khat pan piang hi ngeingei hang e” cih la pen Lengtong No.1 a khum ding lai-un Zangkungah Cia Paute inn sungah TS Khai leh Sua Mang tawh amau teng thum kikumin a phuah uh hi a, Lynn Studio-ah a khum uh ciangin a paisuak (soprano) Vum Nang in sa hi. Tua lai-in a phuak pen Lengtong cih ding a thukim sa uh hi napi-in a nung ciangin a la minthang bilbel ahih manin a “phuak ding ki-ut ciat hi” ci-in gen ngei hi. A la phuahte midangte sangin a hoih zawkna pen a aw ding (tune) zong masa-in tua khit ciangin a thumal, a kammal

ding zong pan hi. Zingsang tungin a thawhphet ciangin lungsim sungah thu dang a lut ma-in la kammalte ngaihsun kik a, Zo la kam man/dik tak a hi hiam, mi zakdah theih ding, khasiat theihna ding kammal a zang kha hiam cih ngaihsun zel a, puahtoto ahih manin a la malte hoih diak se hi. Tua bek hi loin Topa in thupha a piak ngiat ahihna zong a thupi khat ahi hi. Ama hun lai-in Kalemio khawngah Studio om nai loin, Zangkung mah delh kul a, sum a neih loh ciangin sum thalawh tawmin Zangkung pai hi. Zangkungah zong tuhun bang loin eimi tam nai lo ahih manin haksatna tampi kalah hih ciang a tung thei ahi hi. Khang thakte gamtat hoih lohna pana kep cingna dingin music leh la lim taka puah toh ding thupi sa mahmah a, Zola kammal zangin i late puah ding zong a deih ngitngat khat ahi hi. A hih theih lai teng Topa ading a kizat leh Pasian min thanna dingin a kizang den nuam mi ahi hi. Khangno pilna sinte zong pil dinga sin a hih manun hong “Hai kei un la,” i gam i lei adingin hong pilin hong sem un” ci thei hi.

1981 kumin Tedimah “Lengtong Band” ci-in phuan uh a, tua Band sungah Lengtong Pauno, Kam Khen Thang (makai) Go Hau, Sua Mang, leh Pau Thawnte kihel hi. Hih pen Zomi sungah Band masa pen hi dingin kiciamteh hi. A lasak kum 25 cin’na leh Kam Khen kum 50 cin’na Pawi Yangonah 2006 kumin thupitakin bawl uh hi.

(Hih pen Zomi Siamsin Magazine, 2006 sunga Deihpi tawh bolimna sung pan kikaikhawmin a kibeblap ahi hi)

Lia Man Suan Cing (Lia Cingsan)

Lia Cingsan ci-a kithei Lia Man Suan Cing pen Rev. Tun Za Kap leh Nu Vung Khaw Niang sung pana suak unau pasal 1 leh numei 6 sung pan a nihna ahi hi. Khristian innkuan sung panin khangkhia-in 1978 kumin Zeisu gumpa leh honpa in a sang hi. A pa pen Evangelical Free Church of Burma (tu'n EFCM) ah Pastor hi a, a pa in tuiphum pah hi. A pa in Pasion thu leh la tawh pattahin, a nu in thu ngetsak zel hi.



Dorcas Team Piang

1981 kum ciangin a pa makaihna tawh “Dorcas Team” ci-in numei action team khat phuan uh hi. A pa gospel paina-ah zui zelin, a pa in thu genin Dorcas teamte in lasa zel hi. Tua bangin Tedim gam, Manipur gam, Mizoram dongah gospel a pai uh hi. A nu in inn panin thungetna tawh a huh den hi.

1983 kum ciangin “Topa phat ni” cih lakhui khat a bawl uh hi. 1985 kumin “Zeisu'n ong kun” cih lakhui bawlin Lusei kam tawh “Lalpa fak ru” cih la khui 2 bawlin, 1989 kumin Lusei kam mah tawh “Babylon” cih la khui khat zong a bawl hi.

Lai Siangtho Sangkah

1990 kum ciangin Pasion thu sin dingin India gam Gurgeon-ah a naute Liansen leh John Kampi tawh pai uh a, Topa hehpihna tawh kum khat a zo uh hi. Inn lam a ciah kawmun Nagaland-ah a lawmte tawh gospel a pai uh hi. 1991 kum ciangin Bangalore-ah Berean Baptist Bible College & Seminary-ah a naute 3 Liansen, John Kampi leh Kimnu tawh a pai uh hi. Tua kumin Pasion thu leh la tawh a pattah a pian'na pa in nusia hi. Ama munah Pasion ding ahih manin a sang kahna uh a unau-un a zom suak thei uh hi. 1995 kum ciangin BBBC panin B.Th. degree a ngah hi.

EBC-ah Nasepna

1995 June kha panin Evangelical Baptist Conference Pawlpi in hun bit a la tawh Pasion nasem dingin la-in tu ni dongin a sem hi. 1997 kum ciangin a pa patsa zom kik uh a, a team membrete a kim nawn loh hangin amau unau teng mah in “Dorcas Unau” ci-in team bawlin “Phat ding kilawm” cih lakhui a bawl uh hi. 2004 kum ciangin Rocky Mountain (USA) Zomi Innkuante panpihna tawh “Bethlehem Aksi” cih Christmas Album khat a bawl kik uh hi. Hih lakhuite a pian theihna dingin mun tuamtuam a om Zomite thatang, neihsa leh thungetna tawh a panpihna hang bekin a piang thei hi ci-in lungdam mahmah hi. Midangte Album sungah zong a kihelna om kawikawi hi.

Pahtawina

- 1) 1998 kumin Tedim Christian Fellowship in Zogam a lasa siam cih pahtawina pia hi.
- 2) 2003 kumin Momnote in la sa siam pahtawina mah pia hi.
- 3) 2005 kumin ZCLS in lasa siam pahtawina pia hi.

Hih banga pahtawina a ngah theihna pen a pa pattahna leh a nu thungetsakna hang bek hi ci-in a ngahsun hi. Hih sunga kigenkha lo pahtawina a ngah zong tampi tak om hi.

Amah Lia Cingsan in a la khui bawlte pen a pa phuahte leh midangte phuah tam zaw a, ama phuah taktak tam lo hi. BBBC a kah lai-in a pa in sihsan ahihmanin na sa mahmah a, a pa a itna la khat phuak hi. Hih zong “Phat ding kilawm” cih khui sungah kikhum zo hi. A sak ciangin mite lungsim lawngin khitui luangsak thei hi. A dawngkimin en ni.

KA ZUA LENNA THANGVAN

- 1) Siing vangkhua-ah ka hei a,
Zua saumang nuam tung ta ing;
Zua om lo koi na hei maw,
Kei ka hei kidang sang e maw.
 Sawl bang na heina Sian anglai gam nuam hi,
 Hai bang na ngak aw ka zua aw;
 It teng tawh na siang kong leng ding.
- 2) Aw ngilh mawng e ka zua aw,
Mu bang ngai nau bang kah law'ng;
Zuan sial ning e ka pham dong,
Hehnem siam gumpa hong nem aw.
- 3) Len lai ni nuam hong phawng e,
Sian sinthu lel khop lai ni;
Von deih te'n ma na zom nung maw,
Sep zawh ciang zua pa'n hong dawn ding.
(Hib pen Nov. 17, 2007 ni-a ama tangthu a gelhna pan hong kikaikhanm hi)

Langh Do Khup (Do Khup)

Pianna

Kansau khua Pa Vung Thang leh Nu Do Zen Cing tapa giat lak panin a nga-na Sia Langh Do Khup pen 24.12.1968 ni-in piang hi. Unau pasal 7 sung panin a nga-na hi a, tua sung panin 4 in Pasion nasem uh hi. A sanggamte Rev. Cin Za Mung, C.Th., Pastor Kham Kap Lian, B.Th., Sia Kham Sian Pau, B.Th., B.D., M.Div., M.Th. ahi uh hi. 5.1.1996 ni-in Lia Cing Suan Niang tawh kitengin Rev. Go Khen Thang in lethat hi. Tu-in tapa 3 leh tanu 2 nei uh hi. Khitui Gospel Team ci-in nasepna nei-in Kalemryo-ah Pasion nasemin a innkuanun a om uh hi.



Pilna lam

A neu tungin sangkah napi-in leitung vai lam kin zaw ahih manin Tan 8 ciang simin a ban a zom nawn kei hi. Ahi zongin a pianthak (9.8.1990) akipanin Pasion nasemin nakpi takin kizang a, khangnote sungah a kizang mahmah khat ahi hi. Pasion nasepna leh a lai gelhte hangin Bethel Bible College in 2004 kumin B.Th. degree pia hi.

La lam nasepna

Amah pen lasak lam leh la phuak lamah hun bitin a sep loh hangin a la phuakte leh a laigelhte hoih kisa mahmahin Pasion in zang mahmah hi. La dawng tampi mah phuakin, a pianthak ma-in Zawlla tampi na phuak ngei hi. A pianthak ciangin gamngaih la, biakna la, Zola cih bang tampi mah phuak hi. A laphuakte hoih kisa-in kideih mahmah a, 1990 khit cianga Tualsuak La sungah a kideih pawl ahi hi. “Itna sisan luangin” cih bang pen tu dongin sumpi don’na la dingin kizang a, “Lamdang lua aw, lamdang lua sa’ng” cih pen khangnote lainatna la dingin kizangin nu leh pate in deih mahmah hi. “En ve’n ka te’n nang gam nuam” cih zong tunglam ngaihsutna la hi a, kideih mahmah hi.

1991 kumin “Nuntak kikna” kici khui 200 hawm khia a, 1996 kumin “Khitui Gospel Lainatna Aw” kici khui 2000 hawmkhia leuleu hi.

La phuak bek hi loin Zomi sungah Video khui a kideih mahmah “Ngaih Anglai-ah kici pen 2003 kumin Japan a om Zomite tawh a thoh khiat ahi hi. 2005 leh 2006 kumin Ngaih Anglai-ah 2-na leh 3-na thoh leuleu hi.

Tham loin lailam zong hih thei mahmah hi. “Hauhna leh Khansauna Thusim” kici laibu 2000 kumin gelh a, 2007 kumin a nihveina kikhen leuleu hi. Hih laibu pen 2007 kum akipan Manipur University in B.A. III yr. ah Paite Vernacular a zat dingin kipsak hi.

Evan. Lanh Do Khup pen na khat peuhpeuh a hihna-ah citak leh kuhkal ahih manin la phuak thei, lai gelh thei, thugen thei-in talent nei hoih mahmah khat ahi hi.

(a) *Zinmang laal hang ka nawb ni'n ee, tuizum lenmual kal ing ee.*

(b) *Zinlai ben teng ka sutna aw, Sianmang namtem hiam sang ee.*

(Hih thu pen Jan 29,2008 ni-a ama tangthu gelhna sung pan kikaibkawhm hi a, a la phuakte hoih kisa abih manin lasiamte lakah kibel abi hi.)

Nang Suan Kham (David Kham)

Pianna

Buan khua a om Pa Thual Zam leh Nu Do Khaw Nuamte sung pan piang unau pasal 3 leh numei 3 sungah nau lai hi dingin 1966 kum Nov.23 ni-in hong piang khia hi. A min pen Nang Suan Kham hi a, David Kham ci-in kithei tang pen hi. A nu leh pa in Pasion thu tawh pattahin thucin thutang a genpih thei zel uh hi. Mi zahkai thei mahmah mi khat hi a, inn sung ahi zongin biakinnah ahi zongin thungetna, lasaknate-ah kihel mengmeng ngam lo hi. Kum 18 a phak dongin mi muhna-ah la sa ngam ngei nai lo hi. A neu lai-in a pa in la sa dingin sawl thei zel a, a zum manin sak nop lohna-in nei zawsop hi. A neu lai-in a khan'gual te'n simmawh lua-in, sang pan a kap sa-in inn tung den hi. A nu leh pate in "Ka ta aw, tu laitaka hong vuavuate maisak lel in Pasion in ni dang ciangin hong lamto ding hi. Kuakua in bangbang hong bawl zongin thuk kik ngei kei in" ci-in a nu leh pate in hehnem zel hi.



Pilna lam

A nu leh pate deihsakna tawh 1988 kum in Tan 10 ong hi. 1994 kumin piangthak hi. A nu leh pate thu man'na ci-in ut lopipi-in kumpi na semin kum 1994-1998 dong kum 4 sung State Law Office, Haka-ah om hi. Kumpi na a sep sungin Ciimnuai Christian Fellowshipah Lapawl makai semin Pasion thu sungah lawp mahmah hi. 1997 kumin Pasion sapna ngah ahih manin 1998 kum April kha panin Yangonah Lai Siangtho sang kah dingin pai hi. 1999-2003 sungin Evangel Bible College panin B.A. (Theology) a zo hi. A zawh ciangin Word of Hope Pawlpi-ah khangno makai (Youth Director) sem suak hi.

Zi neihna

June 16, 2005 ni-in Siapi Lamh Za Cin tanu Lia Neam Kang tawh siangtho kitenna nei uh a, ta nei nai loin Yangonah amah omin a lawmnu Tedimah Education Office-ah nasemin om hi. A sung pa Sia Lamh Za Cin pen Tedimah District Education Officer ahi hi.

La tawh kisai nasepna

Tan 10 a kah ciangin zum pipi mahin mite lakah lasak leh laphuah hong kipan hi. Love song dawng 40 bang phuak masa hi. 1992 kum ciangin a ngaihsutna hong kilaihin, love song leh leitung late phuak nawn loin Pasion la phuak ding hoih zaw cih ngaihsunin lungdamna late gelh hong kipan hi. A la phuahte Pasion ii sathau nilhna tawh TBA gam sung teng hong kizel pah hi.

1994 kumin Khitui Gospelte a zuihna panin piangthakin 22.6.1994 zan nai 12 hunin Kha Siangtho baptize-na a ngah hi. 1996 kum April kha panin khanlawhna la phuah hong kipan hi. A la phuak khempeuh 300 val ta ding hi. A laphuahte lakah khanlawhna la tam pen a, “Anglai-ah ka pom” cih bang pen Praise and Worship la-in kilim zat mahmah hi. “Topa hoih hi, Topa Lian hi” “Thuman Puanpi,” leh Itna Pasian” cihte kideih phadiak hi. Gospel Series 14 sungah kihel khin a, VCD zaihna leh ZOMUS makaihna tawh Khuado Pawi zatna-ah zong kihel zel hi. David Kham late in mun leh gam nei loin Pasian in zang a, Kawl, Kayin, Kachin, Falam, Matu, Mindat, Thado, Vaiphei, Hmar leh Paihte pau tawh kilet kikin khanlawhna lapi dingin Topa in sathau nilhsak hi.

Kum 2006 panin nasepna “Zomi Revival Songs Ministry” ci-in phuan a, la khui bawlin “Sian Deih Zai Nem” kici 2007 kumin khui pen 3000 a thohkhia hi.

Ama genna panin ni dangin Guitter pen “Dah Khuang” kici a, tangval gina lote zat ding bekin kingaihsun hi. Tu hun ciangin tua bang hi nawn loin Guitar lo tawh biakna kipia thei nawn loin, khuang, lamna leh limna tawh kiphat ta hi. La in mite lungsim lawngin, kikhelsakin, khitui luangsakin, khangno tampi in kikhelna nei hi ci-in gen hi.

(Hib thu pen Nov.12, 2007 ni a ama tangthu a gelbna leh Nov.21, 2007 ni a Shillongah ka bolimna uh pana kikaikhawm abi hi)

Go Lian Suum (David Suum)

Pianna

David Suum ci-a kithei Sia Go Lian Suum pen Dec.16, 1974 ni-in Mandalay-ah suak hi. A pa Hang Khan Pau (ATEO MUSE) hi a, a nu pen Dim Zam Cing hi. A khua lui uh Ngennung hi-in, Tedimah khangkhia hi. Tu laitakin a zi Nu Man Zen Niiang tawh Pasion nasemin Yangonah om hi. A nu leh pa in a pian khatma pekin Pasion nasem dingin a ap khitsa ahi hi.



Pilna lam

Tan 4 dong Tedim Myoma L.P. Schoolah kahin, Tan 5 pan Tan 10 pen State High School Tedimah kah hi. Tua panin B.A. (Theology) pen Evangel Bible College Yangon panin Academic leh leadership award tawh zo khawm hi. 2001 kumin Philippine gam panin Master of Church Music (MCM) degree a ngah hi.

La lam tawh kisai

A neu tunga kipanin la lam leh tunging (music) lam uk mi hi a, Tan 10 ong ding, tua ciang Lai Siangtho degree ngah ding cih a tupnate tangtung hi. Yangonah sang a kah ciangin a ukna kibehlapin music tawh hunbit a Pasion na sep ding lunggulhna lianpi nei hi. Khangnote music leh Pasion thu tawh pattah ding a lunggulhpi pen ahi hi. Hihte hih zawhna dingin Fil.4:3 siksarin “Hong thahatsak pa hangin na khempeuh ka hih zo thei hi” cih leh “upna tawh kalsuan ngam peuh lehang a piang lah na om lo hi” cihte bulphuhin a nei hi. Late 150 bulphuhin “Zeisu pahtawi ni” cih leh “Leitung khempeuh pai un” (Go into the World) cih late phuakin khui sungah a khum hi. A la phuak dangte zong Kawl kam tawh kitei-in khui 4 bang a khum zo hi. La leh music uk ahih mah bangin Philippine, Thailand, Malaysia, Singapore, Hongkong leh Japan cihte-ah pai kawikawi-in la tawh Pasion nasepna a nei ngei zo hi.

Festival of Praise (La Pawipi)

Kum 3 sung bang Zogam leh Zomite in 2 Kum.7:14 bulphuhin kipumkhatna dingin Pasion maipha zon' ding lunggulhna a neih khit ciangin tua phatna Pawipi pen Tedim khua Sanginn tualpi-ah Nov.30-Dec.2, 2005 sung Zomibup huap Pawlpi tuamtuum kipawl khawmin kizang hi. Lapawl 49 kihelin mihing 3900 in “Hallelujah Chorus” cih la Zo kam leh Mikang kam tawh Sia David Suum makaihna-in sa ziahziah uh hi. La kidemna leh Pasion pahtawina thupi takin bawl uh hi. Nitak simin thugenna om a, Rev.Dr. Cin Do Kham (AG), Rev.Dr. Do Suan Mung (EBC), Rev.Dr. Gin Khan Khual (ZBCM), Rev.Dr. Khai Khan Suan (AG), Rev.Dr. Dam Suan Mung (FGA) te in thugenna nei uh hi. Hih pen Zomi khempeuh in Pasion mahmah phat khawm a, tua phatna tawh Pasion maitang zongin tua tung tawnin kipum khatna leh gam leh nam khantohna a pian theihna ding deihna ahi hi. Tua kikhopna-ah nitak simin kikhawm mi 20,000 bang pha den hi. Tua hunah sum Ks.169,00,000 bei hi. Hih zah a thupi Pasion nasepna pen amah David Suum geelna leh makaihna ahi hi. ZOMUS leh TCF te panpihna tawh lawhcing takin a piang ngei nai lo, mai lamah zong a piang kik zo ding hiam cih zong a kigen thei lo “Festival of Praise” pen Tedim khuapi-ah kibawl hi.

Grace Music Institute

Khangnote pattahna dingin music sinna sang “Grace Music Institute” kici Yangonah 2005 kumin phuan hi. Tu-in kum thum ding hi ta a, batch nih in a zo ding hi ta hi. Hih zong Zomi sungah a masa pen hi dingin kiciamteh hi. Khangnote music lamah khantohsak ding a tupna leh a ngimna ahi hi.

Amah in a genna-ah Music in “Lungnopna, hauhna leh minthan'nate hong pia thei hi. Ahi zongin zang khial lehang siatna hong pia thei baih penpenin supna, zawn'na, mindaina leh leitung nuntakna beina dong piangsak thei hi. Music siamna Pasion lamah a zangte in vantung gam malepte hi. Vantungah Pasion phatna leh biakna (Praise & Worship) bek om ding hi” ci hi. A tangthu a kicing zaw-in a thei nuamte in www.GracemusicInsitute.org ah kimu thei ding hi.

(Hih pen Zomi Siamsin Magazine 2006 sunga Cingno in Oct.21, 2005 ni-a a holimpibna leh Festival of Praise thu kigelbna pan kikaikhawm hi)

Family Gospel Team



(Lia Muanting, Sangi, Sangbawi, Kimpi, Imphal mopawi-ab Feb.9, 2008)

Kalemryo Agape Ministry Centre a om Pa Thawng Lian Kam in kum 1990 in Josh.24:15 sung siksantin innkuan a Pasion nasep ding sapna ngah hi. A tate Pasion thu tawh pattahin “Family Gospel” ci-in min phuak hi. Family Gospel Teamte min hih bang hi.

- | | |
|-----------------------------------|---------------------------------------|
| 1) Evan. Thawng Lian Kam (pa pen) | 6) Lia Cing Sen Sang (Sangi) |
| 2) Kim Za Khup (nu pen) | 7) Lia Vung Tawi Lian (Tawinu) |
| 3) Lia Niang Lian Lun (Lunsen) | 8) Tg. Kap Thuam Lal (Lalthuam) |
| 4) Lia Niang San Kim (Kimpi) | 9) Lia Cing San Lian (Sanlian) |
| 5) Tg. Cin Van Kim (Kimpu) | 10) Lia Pau Sian Hoih Vung (Sianhoih) |

Pasion thu a thei nai lote kiangah Lungdamna thu puak ding leh Topa phat dingin kipia uh hi. Tua bangin khual zin kawikawi-in Kawlgam sung mun tuamtuam leh khua neu khuata a phak khit uh ciangin Mizoram, Manipur leh India mun tuamtuamah zong pai uh hi.

Sia Thawng Lian Kam in la 30 val phuak khin zo a, tua a la phuahte leh midang phuahte sa-in zin kawikawi uh hi. Lakhui (Album) zong thum bawl zo uh hi.

1995 – Hallelujah Vol. 1. “Naupangte Zeisu’n it hi.”

1999 – Hallelujah Vol. 2, “Kei leh ka innkuanpihte’n Topa na ka sem ding uh hi.”

2003 – Hallelujah Vol. 3, “Topa’n hong tonpih hi.”

Hih khuite pen copy 2500 ciat hawm khia uh hi. A nasepna uh panin mite in tha ngahin, kikhelin, damna nagawn a ngah om hi. Pasion thu a za nai lote in a zak theihna ding leh Gospel Lungdamna thu tangko ding a tup pen uh ahi hi.

Pasion in kism a sakna peuhpeuhah leitung bupah Pasion ading teci pangin lungdamna thu gen kawikawi dingin a kipiakhia uh ahi hi. Tu laitakin Kimpi leh Sangi in Evangelical College of Theology, Lamka-ah Lai Siangtho a sin laitak uh hi a, Lamka-ah a om uh hi. ECT Trio ci-in Lia Muanting, Kimpi, Sangi in lakhui bawlin pau tuamtuum Thahdo, Hmar, Lusei, Paite, Tedim, Vaiphei, Meitei, English etc. pau tawh lasa-in mopawi leh khoppi khat peuhpeuhah kism kawikawi hi.

Zomi Music Uplift Society

Zomite sungah la lam leh music lam hong khang semsemin mimal hanciamna tawh kipawlna neih ding geelna om hi. Music lam a kin diak leh uk diak pawl khat hanciamna tawh kipawlna 2000 kum ciangin Yangon khua-ah kiphuan a, a min dingin “Zomi Music Uplift Society” kici hi. Tupna leh ngimna hih a nuaia bangin nei hi.

Tupna leh Ngimna

1. Keppingna (Preserving): Zomite ngeina hoihte kemcing ding. Zomite tunging vanzatte (instruments) kaikhawmin kemcing ding. Leitunga a upa mahmah akigen Pentatonic Scale leh Blue Scale-te ih Zo Ngeina Lapi sungah na om bilbel hi. Zo instrument sungah zong aw 7 (diatonic) om zong om hi. Tuni dongin minam lianpipi zong diatonic nei lo om hi.
2. Puahtohna (Promoting): Zo music ngeina hoihte mite theih dinga pholak ding. A kisamte behlap ding a, zuun ding. Zomi sungah pattah huaite pantah dinga, pahtawi huaite pahtawi ding.
3. Pumkhat suahna (Unifying): Beh, Kampau, Biakna Pawlpi, Gamgi cihte tawh a kikhenthang Zomite Music thahatna leh itna masuanin kaikhawm ding. Gawmtuah ding.

Sepnate

Kipawlna a kiphuat a kipan tukum 2007 ciangah nasepnate hih a nuaia bangin kilak thei hi.

- 1) Kumsimin Khuado Pawl bawl ngiatngiat.
- 2) 2004 kumin VCD Volume khat bawl.
- 3) 2005 kum a Zomi Festival of Praise-ah sound system, lasa ding leh tum ding teng ZOMUS in vaihawmsak hi. Tua munah Zomi music lama madawk masa 10, la phuak siam 10, a tum siam 10 te pahtawina pia.
- 4) Ngaih Anglai sunga kineih siam Lia Cingno “Lengtong Hoih Award” pia.
- 5) Zo la series tam bawl pen Pa Pum Za Kap pahtawina pia.
- 6) Gamdang pana music Sang pana zosa teng zong pahtawina pia.
- 7) 2005 kum mahin Tedim, Kawlpi, Singapore leh Malaysia-ah ZOMUS Branch hong.
- 8) 2006 kumin Tonzangah ZOMUS branch hong.
- 9) 2006 sung a Ph.D. a zo Dr. C. Thang Za Tuan adviser ahihna tawh pahtawina pia.

- 10) 2006 kum mahin Lengtong Pauno lasak zawh kum 25 cin'na pawih leh Lengtong Kam Khen kum 50 cin'na pawite-ah pahtawina pia.
- 11) 2006 kum Nov.11 ni-in Live Show nasia takin bawlin ZOMUS VCD Vol-2 hi pah.
- 12) 2007 April 23- May 25 dong “ZOMUS Summer Music Training-1” bawl.
- 13) Singapore ZOMUS te thusiamna tawh T.S. Khai Singapore leh Malaysia-ah ZOMUS minin paisak. Zogam Lapu “birthday leh ordination” ngahna pawih-ah zong pahtawina pia.

Mai lam Kalsuanna ding geelna

1. Short Term Planning:

- 1.1. Sepsa teng zom to ding
- 1.2. Zomi tam deuhna mun tengah ZOMUS branch phuan ding.
- 1.3. ZOMUS member teng leh mipi tawh kithuzaktuahna ding “ZOMUS Newsletter” bawl zawhna ding.
- 1.4. ZOMUS website kician mahmah khat neih zawhna ding. Tua website pan VCD/DVD dong a kizuak zawhna ding.
- 1.5. Computer (Scanner, Printer) a kim a neih zawhna ding.
- 1.6. Zum inn ding mun hoih khat kawm zawhna ding.

2. Long Term Planning:

- 2.1. Leitung a huamzo Zomi Idol neih zawhna ding.
- 2.2. Zum inn leh Studio hoih mahmah khat neih zawhna ding.
- 2.3. Gam Lapi (National Anthem) neih zawhna ding.

Hih a tunga teng a tangtun theihna dingin pankhop loh phamawh ding hi. Zomi leh Zogam a it khempueh tawh pangkhawm dingin ZOMUS kigingsa-in om hi. “Pan khopna in gualzawhna hi.”

Tu laitak a makaite:

1. Pa En Khan Nang - President (2000-)
2. Tg. Pau Lun Min thang - Vice President -1 (2007-)
3. Sia Nang Sawm Piang - Vice President-2 (2007-)
4. Rev. Ngul Cin Thang - Vice President-3 (2000-)

5. Tg. Mung Laan Thang - General Secretary (2000-)
6. Tg. Stephen Gin Lal Mang - Secretary -1 (2007-)
7. Tg. Zam Khen Khai - Secretary-2 (2007-)
8. Sia Thang Nen Pau - Secretary -3 (2000-)
9. Pa SB Suan Khan Langh - Treasurer (2000-)

Advisors:

- | | |
|---------------------------|---------------------------|
| 1. Rev.Dr. S. Pau Khan En | 4. Rev.Dr. Dam Suan Mung |
| 2. Dr. C. Thang Za Tuan | 5. Rev.Dr. Khup Lian Mang |
| 3. Dr. Mang Cin Pau | 6. Pa Pum Za Kap |

Ciapteh ding: Secretary sem masa pen Rev. Thang Za Pau (2000-2004) hi a, Accountant masa pen Lia Vial San Lun (2005-07) hi.

ZOMUS in sum ngahna kician nei loin mite huhna tungah kinga a, tu ciangciang hong huhte:

- 1) Zomi Student & Youth Organization (East) – ZSYO -Ks. 10,000
- 2) Zomi Innkuan Singapore –ZIS - Ks. 1,25,000

(Hib pen ZOMUS President Pa En Khan Nang in Oct. 30, 2007 ni-a hong puak ZOMUS tangthu sung pan kila hi a, panmun lente zong akikheel om khin kba ding hi)

Zomi Festival of Praise (ZOFOP)

Yangon a om Zomite in music tawh Zomite pumkhat suahna ding hanciamna nei-in a tangtun theihna dingin Zomi Lasak Pawipi (Zomi Festival of Praise) hong bawl khia uh hi. Hih hanciamna a tangtun theihna dingin ZOMUS leh Tedim Christian Fellowship tawh pang khawmin Nov.30- Dec.2, 2005 sung Tedim khua-ah thupi takin Pawi kizang hi.



Mi 3900 lasakna Dec.2, 2005, Tedim

ZOFOP kici hong pian khiatna

Kum 2001 a Philippine gam panin Master of Church Music degree tawh hong ciah David Suum in ni danga a ngaihsut khak ngei loh thu khat hong ngaihsun hi. Tua a ngaihsut thu in A neihsun music pilna tawh,

- 1) Zogam khantohna ding
- 2) Zomite khantohna
- 3) A tunga thu nihte sep khopna in Pasion nasepna hi ding cih thute ahi hi.

Hih banga gam ading, minam ading leh Khris ading bang tawh ma pang thei ding ka hi hiam ci-in a ngaihsut laitakin a lungsim sungah “Hallelujah Chorus” Lapi kilo khia hi. Tua pen Pasion hopihna hi ding hi ci-in lungmuanna khat a nei hi. Hih Pasion piak ngimna a neihte midang kiangah a gen kawikawi ciangin hoih sakkpik tek uh hi. Tedim Christian Fellowship

Committee (2005-2007) in innteekpi sem dingin a kipiak ciangin nasepna kipan thei ta hi. Zomi bup in lasak Pawipi khat bawl dingin a ngaihsun uh hi.

ZOFOP bang cihna hiam?

Z-O-F-O-P cih pen Manglai panin a tomno a kila hi a, “Zomi Festival of Praise” cihna hi. Tedim kamin “Zomi bup Pasion Phatna Pawipi” hi a, Rev.Dr. Do Suan Mung in phuaksak ahi hi. Pawipi sungah mimal aw 3900 in *George F. Handel (1685-1759)* phuah **“Hallelujah Chorus”** lapi tawh Pasion phatna nei-in Zo kam leh Mikang kamin sa ziahziah uh hi. Tua Pawi a kizat khit ciangin “Hallelujah Pawipi” ci-in min kivawh hi. Hih a min ZOFOP pen ZOLUS, ZOMUS cihte tawh a kihual thei dingin Rev. Tuan Khan Mung in ngaihsutna a piak ahi hi.

Tupna leh Ngimna

2 Kum.7:14 sung siksarin Lai Siangtho kammal a om bangin Pasion maipha zon’na ahi hi. “Zomite Pasion mai-ah kiniam khiatin thungenin **“Phatna”** tawh Pasion maipha zong a i gitlohnate pan kisik lehang Topa in vantung panin hong za dinga, i khialhnate hong maisakin i minam leh i gam leitang hong hoihsak kikin **“Thupha”** hong pia taktak ding hi” cih ngimna ahi hi.

Hun Zatzia

Pawipi sung pen sun nih leh zan 3 hi a, Nov.30 pan Dec.2, 2005 sung ahi hi. A nuaia bangin hun zang kizang hi. Lasa dinga geelna masa-ah mi 3000 ngah ding hi a, up mawh sangin mi tamzaw-in lapawl tuamtuam 49 sung panin mimal 3900 pha thei hi.

- 1) Nov.30 nitak masa ni-in “Zomite ninphual panin hong lamto a leivui panin hong domto i biak Topa tungah “Lungdam kohna” hun kizangin Rev.Dr. Chin Do Kham in hanthotna thu gen hi.
- 2) A ni nihni Dec.1 ni sun thapai-in Lapawl kidemna om hi. Lapawl khempeuh 49 pha-in kizozo lo hi.
- 3) Dec.1, Nitak ciangin “Zomite i mawh i khialhnate kisikkik a “Topa maitang zongin thumna hun” kinei hi. Rev.Dr. Do Suan Mung leh Rev.Dr. Dam Suan Mung in hanthotna thu gen hi.
- 4) Ni thum ni Dec.2, sunin la kidemna mah om kik hi.
- 5) Dec.2, Nitak nai 4:00 PM ciangin Lapawl khempeuh 49 kigawm mi 3900 in “Hallelujah Chorus” Lapi tawh Topa phat ziahziah uh hi. Tau sang kidawh tung panin Zo nam puan silhin Tukpaak lukhu khu sa-in Sia David Suum in khut tawh piahin makaih hi. Lasa khempeuh in zong nam puan silh tek uh hi. Lapi pen Tedim kam leh Mikang kam tawh

kisa a, phatna aw in Tedim khuapi sung thawn hi. Nitak kikhop ciangin “Topa thupha ngetna” hun kinei a, Rev.Dr. Gin Khan Khual leh Rev.Dr. Khai Khan Suan in hanthotna thu gen hi.

- 6) Nitak kikhop khit ciangin ZOMUS te makaihna tawh Zomi vontawi lasa siam, music siamte in Pasion min phatna leh gam itna late sa-in (Concert) thupi takin kizang hi. Nitak sim kikhawm mi 20,000 pha den hi.

Hih hanciamna a tangtun theihna dingin Tedim Christian Fellowship in inntekpi semin a gim pen leh a tawl pen ahi uh hi. Gelnah leh ngimna a nuam dingin Kawlpi leh Tonzangah Sub-Committee kibawlin sep ding kisam khempeuh kithu tuak takin kistem hi.

Vaihawm masakna tawh kizui-in thu leh la, sum leh pai akipan haksatna tampi a om ciangin mi tampi in a piang zolo dinga a ngaihsut thu pen a hun a tun taktak ciangin lametna sangin tangzai zaw leh thupizaw-in a pian ciangin mi khempeuh lungsim sukha-in Pasion hoihna zong kiphawk hi. Sum bei khempeuh Ks.1,69,000,000 sung panin a kipat lianin Ks.70,000 bek tawh kipan hi. Hih sum beite pen gam sung leh gampua a om Zomi kipawlina tuamtuam panin huhna kingah ahi hi. Sum lam tawh kisai tavuan la ahi David Suum mahmah in zong Pasion pen a kisik tawm Pasion ahihna thu teci pang hi.

Lungdamna Khitui Luang

Zomi lia leh taangte in Topa min phat dingin mun a lak laitakun mipite tung leh lasa dingte tungah Pasion Kha Siangtho hong kibua hi. Kha Siangtho ompihna hangin mipite thumang ngiatin, kipumkhatnate lamdang takin kimu thei hi. Kawlpi Sub-Committee President ahi Pa Hang Lian Khup in awliatna tawh “Phatna la sa dingin phungtung lamah a kahto ziahziah puankang silhte pen vantungmite sakha kei un. Vantung mi hilo in thupha ngah Zomite hi... Tedim gamah Sangmang Cope Topa in Pasion thu a nungta hong puak a Khamtung gamah a lutang hong phumna kisik peuhmah lo ding hi. Pasion khephung pan hong ensuk leh lungkim mahmah ding hi...” hong cih tak ciangin mipi khempeuh cimul tho-in ki-ip zo loin “lungdamna khituite” luang ziahziah hi. Tua ni-in lungdamna khitui tawh Pasion phat ziahziah uh hi.

Phattuumnate

Pawipi hangin phattuumna tuamtuam a nuaia bangin kimu thei hi.

- 1) Pawlpi kideidanna om loin na kistem khawm hi.
- 2) Upna hanga Pawlpi kikhente ZOFOP in hong gawmkik hi.
- 3) Zomite dinmun hong lak hi.
- 4) Zogam leitangah Sangmangte nasepna gah ahi hi.

- 5) Minam itna lungsim hong khangsakin minam puan tampi in neih lawh hi.
- 6) Khua sungah ki-itna leh kilemna, kithutuahna leh kipumkhatna khang hi.
- 7) Zogam leh Zomite tungah Pasion thupha tampi hong luang hi.
- 8) Pasion phat nopna lungsim hong khangsak hi.
- 9) Mi tampi up zawh loh khat hong pian' takpi ciangin Pasion hih theihna thuk takin kimu hi.
- 10) "Gualzawhna in Pasion aa" ahihna Zomi bup tungah kilang hi.

Lapawl (Choir) kihel teng

Lasa group vekpi 49 pha a, a kihel khate hampha kisa mahmah uh hi. Khankhat sung adingin Pasion thupha lianpi khatin kingaihsun tek hi. A kihel groupte a nuaia bang ahi hi.

- | | |
|--|-------------------------------------|
| 1) Agape AG, Kalemyo | 17) Gospel AG, Tonzang |
| 2) Anlang Christian Fellowship | 18) Heilei Christian Fellowship |
| 3) Bethel AG, Tedim | 19) Kapteel Christian Fellowship |
| 4) Bethel Bible College, Tedim | 20) Keizang Christian Fellowship |
| 5) Bethsaida AG, Tahan | 21) Lamzang Baptist Church |
| 6) Ciimnuai Christian Fellowship, Haka | 22) Lawibual Baptist Church |
| 7) Cope Memorial Baptist Church, Tedim | 23) Leilum ABC, Tedim |
| 8) Emmanuel Baptist Church, Kalemyo | 24) Leipi Baptist Church, Kalemyo |
| 9) Emmanuel Theological College, Kalemyo | 25) Lezang Baptist Church |
| 10) Evangel Baptist Church, Kalemyo | 26) Munlai Baptist Church, Kalemyo |
| 11) Faith Baptist Bible College, Tedim | 27) Ngennung Christian Fellowship |
| 12) Fuller AG, Kalemyo | 28) Pentecostal AG, Tedim |
| 13) Galilee AG, Kalemyo | 29) Phai Christian Fellowship |
| 14) Gamlai Christian Fellowship | 30) Phaiza Christian Fellowship |
| 15) Gawngmual Christian Fellowship | 31) Phualpi AG, Kalemyo |
| 16) Gawsing Christian Fellowship | 32) Pimpih Christian Fellowship |
| | 33) Pinlong Baptist Church, Kalemyo |

- | | |
|--------------------------------------|--|
| 34) Pyidawtha Baptist Church | 43) Tuilang Christian Fellowship |
| 35) Saizang Christian Fellowship | 44) Tuitum Christian Fellowship |
| 36) Sakollam Baptist Church, Tedim | 45) Tungtuang Christian Fellowship |
| 37) Suangsang Christian Fellowship | 46) Valvum Christian Fellowship |
| 38) Tahan Baptist Church, Kalemyo | 47) Vial Nang Memorial Baptist Church,
Tonzang |
| 39) Tamu Christian Fellowship | 48) ZBA, Tonzang |
| 40) Tedim Theological College, Tedim | 49) Zomi Christian Theological Seminary,
KBC, Kalemyo |
| 41) Teklui Christian Fellowship | |
| 42) Thuklai Christian Fellowship | |

Ciapteh ding: Christian Fellowship min tawh a dingte pen biakna tuamtuam Baptist, AG, UPC, RC cih bang kigawm ahi uh hi.

Thukhupna

“Topa in inn lam kei leh a lam mite a mawkna hi. Topa in khuapi hu kei leh a hu mite a mawkna ahi hi” a cih mah bangin Topa hong panpihna hang bekin ZOFOP nuam takin akizo thei ahi hi. Pawipi sungin kitot kisel leh thu nawngkai bangmah a om loh pen Pasion ompihna a kilatna nam khat zong ahi hi. ZOFOP nasepna tungah gualzawhna hong pia i biak Topa Pasion in minthanna, uk zawhna leh pahtawina ngah tawntung ta hen.

(Hib thu pen makaipi abi Sia David Suum in ZOFOP tangthu Nov.1, 2007 ni-a a gelbna panin hong kila abi hi)

Zomi Concert

Zomi Christian Literature Society inntekna tawh kum 2000 a kipanin kumsimin “Zomi Concert” ci-in lasak Pawi kibawl hi. 2007 kum tanin 8 vei kibawl khin zo hi. Hih Concert in a tupna leh ngimna pen La tung tawnin khangnote lungsim kiheisak ding leh lai lam ukna khantohsakna ding ahi hi. Concert neihna khua leh a hun hih a nuai a bang hi.

<u>Kum</u>	<u>A Ni</u>	<u>Zindo Pawlpi</u>
1) 2000	Nov. 14-16	Leipi
2) 2001	Nov. 13-16	Leipi
3) 2003	June 25-27	Galilee AG
4) 2004	Nov. 21-24	Tahan
5) 2005	Nov. 11-18	Tedim (CMBC)
6) 2006	Oct. 27-29	Tonzang (VMBC)
7) 2007	April 20-22	Thangnuai
8) 2007	Oct. 15-18	Leipi

Ciapteh ding: Thangnuai a pen Annual EC tawh kithuah a, tua lo a tamzaw pen Seminar tawh kithuah hi.

(Hib pen Nov. 9, 2007 ni-a ZCLS Secretary Rev. Swan Kben Mung hong puakna banga kila abi hi)

Mai Lam Kalsuan Zia Ding

Mai lamah labu i bawl ciangin a la min leh a phuakte min a kigelh pahpahna labu I neih zawhna ding hanciam huai ding hi. Tua ahieh manin laphuakte in amau phuakte ciamtehna laibu atuamin nei thei leh deihhuai ding hi. La phuak siamte in eima uuk lam bek phuak loin, a hun zui a sak theih ding phuak sawm lehang deih huai ding hi. A diakin Lungdam Bawl leh Kumthak la lam i hau nai kei hi. I neih lohte i neih zawhna dingin hanciam huai ka sa hi. I la phuakte a tamzaw pen khattangsak (Solo) a sak ding tam zaw hi. Mipi sak ding, Lapawl (choir) sak ding, mimal sak ding cih bangin a nam tuamtuamin phuak thei leng deih huai ding hi. La hoih mahmah, a thu kideih napi a awkaih in a zuh loh ciangin biak piakna leh mipi in a kisa thei lo pawl khat om hi. Tua ahieh manin laphuakte in zong a sa dingte enin la phuak thei lehang deih huai ding hi. Tua banah Music lam i gen ciangin Mikangte music bek zat theih danin ngaihsutna i nei lai hi. A hoihte la-in a hithei ciangciangah eima minam music vante zong i zat siam ding zong thupi ding hi. Khuang, Zam, Daak, Sialki, Daaktal, Taamngai, Pengkul, Dingdong, cih bang Zomite in zong music van tampi i nei hi. Hihte tawh Pasion i phat theih hun ciangin mite in hong ciamteh thei pan ding uh hi.

Lasiam tampi tak i hel zawh loh om a, Sia Tuan Khan Mung, Thawnkham, J.K. Kam, T.L. Mungbawi, Kapno, Lia Lialian, leh i theih khak loh tu naia a minthang zong om ding hi. Mai lamah hih lam tawh kisai a kicing zaw leh a tangzai zaw a gelh thei hong ompah ding lamen ni.

GK

Laigelhpa' Tangthu

Hongnusia khin Pa Khup Khaw Nang (Khupson) leh Nu Dim Niang (Suante) tapa 6 leh tanu 3 sung panin a sagihna Gin Khan Nang pen 1945(?) kumin Mizogam, Murlen khua-ah piang hi. Mizogam kumpi nuai-ah 1963-1967 dong Sangsia sem hi. Mizogam buaina (1966) hangin 1967 kumin Siangsia pan tawpin Lamka-ah sangkah kik a, Sielmat Christian High School (Lamka) panin 1969 kumin Tan 10 zo hi. Medical lam sin ding a lunggulh hangin Pasian in a nasem dingin



sam hi cih a phawk ciangin Chin Baptist Association huhna tawh Eastern Theological College, Jorhatah kahin B.Th. 1975 kumin zo hi. United Theological College Bangalore panin 1983 kumin B.D. a zawh khit ciangin International Baptist Seminary, Ruschlikon, Switzerland panin 1990 kumin Th.M. zo leuleu hi. 1975 kum akipanin Chin Baptist Associationah kum 20 (1975-1994) semin, Zomi Baptist Church (Mizogam) ah kum 10 (1995-2005) sem hi.

Pawlpi-ah a sep sungin pan mun tuamtuum lenin Youth Secretary, Finance Secretary leh Executive Secretary zong kum tampi sem hi. Rev. Khup Za Go tawh 1975 kumin Lai Siangtho khetna lamah tavuan la-in New Testament Pocketsize khetna-ah mabung hi. Minam vei mi ahih mah bangin Lai leh pau khantohna ding a lunggulh leh a hanciam mi khat hi a, Magazine tuamtuumah Article a gelh banah Nipi Sang laibu a kipan hilhcian bu leh Naupang Labu zong a bawl ngei hi. *Lungdamna Aw* leh *Laitai-ah* zong Editor tavuan hun sawtpi mah len ngei hi. 1994 kumin “Ka Khualzinna Gamte” cih laibu gelh a, a bu nihna zong a kaikhop laitak ahi hi. Tu laitakin Fuller Theological Seminary (USA) ah Ph.D. a sin laitak hi a, hih “Zomi Lasiamte Tangthu” kici zong a sangkah kawmin a kaihhopna panin hong piang ahi hi.

Tapa khat leh tanu 4 nei-in, tupa 3 leh tunu 1 zong nei a, tu laitakin a zi Cing Za Man leh a tanute thum tawh Shillongah om uh hi.

TOMLAKNA (ABBREVIATIONS)

ABC	- Asian Baptist Church?
AG	- Assemblies of God
B.A.	- Bachelor of Arts
B.D.	- Bachelor of Divinity
B.Th.	- Bachelor of Theology
BBBC	- Borean Baptist Bible College
C.Th.	- Certificate of Theology
CMBC	- Cope Memorial Baptist Church
EBC	- Evangelical Baptist Conference
ECT	- Evangelical College of Theology
EFCB	- Evangelical Free Church of Burma (Myanmar)
FGA	- Full Gospel Assembly
ICB	- Independent Church of Burma (Myanmar)
KBC	- Kuki Baptist Convention (Church)
M.Div.	- Master of Divinity
M.Th.	- Master of Theology
MCM	- Master of Church Music
Ph.D.	- Doctor of Philosophy
RC	- Roman Catholic
TBA	- Tedim Baptist Association
TCF	- Tedim Christian Fellowship
Th.M.	- Master of Theology
UK	- United Kingdom
UPC	- United Pentecostal Church
USA	- United States of America
VMB	- Vial Nang Memorial Baptist Church
ZBA	- Zo Baptist Association
ZBCM	- Zomi Baptist Convention of Myanmar
ZCLS	- Zomi Christian Literature Society
ZIS	- Zomi Innkuan Singapore
ZOFOP	- Zomi Festival of Praise
ZOLUS	- Zomi Literature Uplift Society
ZOMUS	- Zomi Music Uplift Society
ZSYO	- Zomi Student & Youth Organization

Lungdam!

Hih ebook *Zomi Lasiamte' Tangthu* deihsakna leh phalna hong pia Rev GK Nang tung ah lungdam mahmah hi.

A download leh a sim mimal khat ciat tung ah zong lungdam mahmah hi. Hehpihna tawh na lawmte leh innkuanpihte tawh email tawh ahizong in USB – pendrive-te tawh ahizong na ki pia kei un. Tua sang in Vaphual.net pan download theih hi cih na kihilh zaw un.

Vaphual.net pen Zomi thukizakna website khat ahihi. Ebook dang zong om a, na deihte na download hamtang in!

Carey Suante, Editor www.Vaphual.net – Zomi News & Online Magazine

Zomi Lasiamte' Tangthu

Rev. G.K.Nang

Important Notice: Hih laibu a gelhpa Rev GK Nang' phalna leh deihsakna tawh Vaphual.net pan a mawkna in hong kihawm khia ahihi. Lungdam thu puak nuamte'n Zomi Yahoo! Groups ah suah un!

First Publication, 2009 Copyright: Zo Aw Publications, Guwahati.

Designed & Edited by Carey Suante, Editor www.Vaphual.net – Zomi News & Online Magazine